

Kapisilinniarneq pillugu Namminersorlutik Oqartussat nalunaarutaat

Aalisarneq pillugu Inatsisartut Inatsisaanni nr. 18-imi 31. oktober 1996-meersumi, § 5, § 8, § 10, § 10a, imm. 1, § 13, imm. 2, § 23, § 24, imm. 1, § 25, § 26, § 33, imm. 2 aamma § 34, imm. 3, soorlu Inatsisartut inatsisaanni nr. 6-imi 20. maj 1998-meersumi, Inatsartut inatsisaanni nr. 5-imi 21. maj 2002-meersumi aamma Inatsisartut inatsisaanni nr. 28-mi 18. december 2003-meersumi, Inatsisartut Inatsisiliaa nr. 17-imi 3. december 2009-meersumi, kingullermillu Inatsisartut Inatsisiliaa nr. 5-imi 4. juni 2012-mi allanngortinneqarsimasoq tunngavigalugu aalajangersarneqarpoq:

Atuuffia

§ 1. Nalunaarut kapisilinniarnermut tamarmut imartani Kalaallit Nunaata aalisarnikkut oqartussaaffigisaani Nunap Isuata kitaani NAFO-p sumiiffilersuiffiani 1-imi ingerlanneqartumut atuuppoq. Tunngaviusumik killigititami 40 sømilit avataanni aalisarneq inerteqqutaavoq.

Imm. 2. Kalaallit Nunaata Kangiata aalisarfittaani kapisilinniarnermi malittarisassat nalunaarummi §§ 5 imm. 1 nr. 2, § 6, § 7, § 8, § 9, § 10 aamma § 12-mi taaneqartut taamatuttaaq atuupput. Tunngaviusumik killigititami 12 sømilit avataanni kapisilinniarluni aalisarneq inerteqqutaavoq.

Imm. 3. Nalunaarut aammattaq kapisilinnik pisinerup tunisinerullu nalunaarutigineqarnerinut kiisalu inuussutissarsiummut atatinngu kapisilinniarnermi pisat nalunaarutigineqarnerinut atuuppoq.

Nassuiaatit

§ 2. Inuussutissarsiutigalugu kapisilinniarneq nalunaarummi matumani paasineqassaaq pisat tamaasa ilaannaasaluunniit tuniniarnissaat siunertaralugu kapisilinniarnerit. Inuussutissarsiutigalugu kapisilinniarneq akuersissummik allagartallit kisimik kapisilinnik tuniniaasinnaatitaapput.

Imm. 2. Inuussutissarsiummut atatinngu kapisilinniarneq nalunaarummi matumani paasineqassaaq nammeneq atugassanik kapisilinniarnerit.

Imm. 3. Kapisilinnik pisineq nalunaarummi matumani paasineqassaaq inunnit kapisilinniarneq akuersissummik allagartaqartunit toqqaannartumik pisineq tiguserlu.

Imm. 4. Piffissaq aalisarfusoq nalunaarummi matumani paasineqassaaq piffissatut imaluunniit piffissat ilaattut kapisilinniarneq sinnaatitaaffittut.

Imm. 5. Pisassat ilaat nalunaarummi matumani paasineqassaaq pisassat tamarmiusut piffissami aalisarfusumi piffissami aalajangersimasumi aalisarneqarsinnaasutut.

Inuussutissarsiutigalugu kapisilinniarnermut piumasaqaatit

§ 3. Akuersissummik allagartamik tunineqartut kisimik inuussutissarsiutigalugu kapisilinniarsinnaatitaapput. Inuussutissarsiutigalugu kapisilinniarsinnaanermut allagartat akuersissutit Naalakkersuisunit tunniunneqassapput.

Imm. 2. Allagartat akuersissutit qinnuteqartunut piumasaqaatinik makkuninnga naamassinnittunut tunniussisoqarsinnaavoq:

1) Inuiaqatigiinnut kalaallinut attuumassuteqavissunut, tak. aalisarneq pillugu Inatsisartut inatsisaanni § 3, imm. 4.

2) Qassutitik kapisilinniutitik aamma angallammik kapisilinniummik 12,8 meterit (42 fod) tikillugit tamakkerlugu angissusilimmik nammineq pigisaqartunut.

3) Qinnuteqarnermut atatillugu qinnuteqartumit pigineqartut qassutit kapisilinniutit qassiunerinik qanorlu ittuunerinik imaluunniit ilisarnaataannik nalunaaruteqartumut.

Imm. 3. Angallatit raajarniarnermut atorineqartut inuussutissarsiutigalugu kapisilinniarnermut atorineqassanngillat.

Inuussutissarsiutigalugu kapisilinniarnermi piniutit

§ 4. Inuussutissarsiutigalugu kapisilinniarneq qarsorsat qassutilluunniit tasillugit 140 mm-inik nigartallit atorlugit taamaallaat ingerlanneqassaaq. Qassutit tissukartittakkat atorineqarsinnaapput, taamaattorli atuineri ataatsimi amerlanerpaamik uiguleriit 20-kkuutaarlugit.

Imm. 2. Qassutit nigartaat uuttorneqassapput aalisarnermik nakkutilliisut uuttuutaata $\frac{1}{2}$ kiilumik oqimaalutserlugu nigartamut ikkunnetarigut nakkartinnetarigullu. Qimiaa puttalatitsisoq atuarlugu nigartat 20-t qimiaanut ungaseqatigiit uuttorneqassapput. Nigartat tamarmik imm. 1-imi piumasaqaat eqqortissavaat.

Imm. 3. Qassutit kapisilinniutit atorineqartut tamarmik piginnittup aqqanik imaluunniit taassuma angallataata normuanik nalunaaqutsersugaassapput. Nalunaaqutsiineri atorineqartoq imermi allannguajaatsuussaaq.

Imm. 4. Silap pissusaata taamaattoqartissinnaappagu qassutit kapisilinniutit akuttunngitsumik akulikitsumillu qassusiarfigineqartassapput, pisat uumanissaminut periarfissaat ajornerulertussaajunnaarlugit.

Imm. 5. Qassutit tissukartittakkat nalinginnartut nalunaaqutaqarlutillu qulleqassapput.

Inuussutissarsiutigalugu kapisilinniarnernup aqunneqarnera

§ 5. Inuussutissarsiutigalugu kapisilinniarneq imatut ingerlanneqassaaq:

1) Pisassiisarluni aalisarnertut ingerlatseqatigiiffinnut pisiortortunut tunisassanik.

2) Pisassiisarani aalisarnertut taamaallaat najukkani assigiinngitsuni kalaalimineerniarfiit kiisalu akunnittarfiit, neriniartarfiit, napparsimmaviit, ilinniartut ineqarfii nerisaqarfillu tamanut ammasut allat aqqutigalugit tuniarneqarsinnaasunik.

§ 6. Aalisarnermut, tak. § 5, imm. 1, nr. 1, Naalakkersuisut ukiut tamaasa, nunat tamalaat akornanni isumaqatigiissutit mianeralugit, Kitaani kapisilittassat amerlanerpaaffissaannik aalajangersaasassapput. Pisassat pisassanut immikkoortiterneqarsinnaapput piffissap ilaani aalisarneqarsinnaasutut agguataarneqarsinnaallutik.

Imm. 2. Naalakkersuisut KNAPK-lu isumasioqatigereerlugu inuussutissarsiutigalugu kapisilinniarnissamut piffissat ilaannut ataasiakkaanut ulloq aallartiffissaq aalajangertassavaa. Piffissat ilaannut ataasiakkaanut

ulloq aallartiffissaq kommuninut ataasiakkaanut, KANUKOKA-mut, KNAPK-mut kiisalu nuna tamakkerlugu tusagassiorfiit aqqutigalugit nalunaarutigineqassaaq.

Imm. 3. Inuussutissarsiutigalugu kapisilinniarneq piffissat ilaannut ataasiakkaanut ulloq aallartiffissatut aalajangerneqartuq sioqqullugu aallartinneqassanngilaq aammalu piffissat ilaasa ataasiakkaat naanerisigut unitsinneqarluni imaluunniit pisassat ilaat nungunneqarpata.

Imm. 4. Inuussutissarsiutigalugu kapisilinniarneq taamaallaat pisassatut aalajangerneqartut, aalisakkat uumatillutik uuttuutaattut (ilivitsuutillugit) kiilunngorlugit taaneqartut, iluanni pisinnaavoq.

Imm. 5. Inuussutissarsiutigalugu kapisilinniarnemit pisat Kalaallit Nunaata avataani taamaallaat pisiariortorneqarsinnaapput tuniniarneqarsinnaallutillu Naalakkersuisut pisinnaatitsineratigut.

§ 7. Kapisilittassiissutit ilaat aalajangikkat tamakkerlugit pisineneqarnissaat qanillippat, Naalakkersuisut nalunaarutigissavaa, qaqugu inuussutissarsiutigalugu kapisilinnik aalisarneq kiisalu taamatut aalisarnermit pisanik pisineq aamma tunisineq unissanersoq.

Imm. 2. Tamanna kommuninut ataasiakkaanut, KNAPK-mut KANUKOKA-mullu aammalu nuna tamakkerlugu tusagassiorfiit aqqutigalugit nalunaarutigineqassaaq.

Imm. 3. § 6, imm. 3 naapertorlugu aalisarneq unippat, inuussutissarsiutigalugu kapisilinniarneq sunaluunniit kiisalu aalisarnermit tamatumanga pisineq tunisinerlu inerteqqutaalissapput.

§ 8. Aalisarnermut, tak. § 5, imm. 1, nr. 2, Naalakkersuisut kapisilinniarnepulloq aallartiffissaa unitsinneqarfissaalu ukiut tamaasa aalajangersartassavaat.

Imm. 2. Aalisarneq unitsinneqarpata, tak. imm. 1, inuussutissarsiutigalugu kapisilinniarneq kiisalu taamatut aalisarnermit pisanik pisiortorneq tunisinerlu inerteqqutaalissapput.

Inuussutissarsiutigalugu kapisilinnik aalisarnermit pisanik nalunaaruteqartarneq

§ 9. Kapisillit pisineneqartut tamarmik Kalaallit Nunaanni Aalisarnermik

Akuerissutinik Nakkutilliisoqarfimmut (KANUAANA) nalunaarutigineqassapput.

Imm. 2. Tunisat imaluunniit akigineqartut amerlassusii "niaquernagit erlaveerlugit" (MHUI) nalunaarutigineqarpata naatsorsueriaaseq 1,11 atorineqassaaq aalisakkat ilivitsunngortillugit naatsorsorneranni.

Imm. 3. Tunisassiorfimmut ingerlatseqatigiiffimmut tunisinermi ingerlatseqatigiiffiup tunisanik nalunaaruteqarnerit ullut tamaasa KANUAANA-mut nassiuttassavai, tak. imm. 5.

Imm. 4. Aalisartut inuussutissarsiutigalugu kapisilinniarnissamik akuersissummik allagartamik pillit, toqqaannartumik kalaalimineerniarfinni tunisisartut imaluunniit toqqaannartumik pisisartumut kalaalimineerniarfiit avataanni tunisaqartartut ullut tamaasa tunisatik nalunaarutigisassavaat.

Nalunaarsuinerit nalunaarummut ilanngussami 1-mi pisassapput. Nalunaarsuinerit KANUAANA-mut, Postboks 501, 3900 Nuuk, Telefax 346360 imaluunniit e-mail gflk@nanog.gl-imut nassiunneqassapput, kingusinnerpaamik aalisarnerup naammassineqarnerani imaluunniit aalisarfiup ulluisa kingullersaani.

Inuussutissarsiummut atatinnagu kapisilinnik aalisarnermit pisanik nalunaaruteqartarneq

§ 10. Inuussutissarsiummut atatinnagu pisassiissutit aalajangersarneqartut avataasigut kapisilinnik aalisarneq § 5, imm. 1, nr. 1 naapertorlugu danskit naalagaaffianni innuttaassuseqartunit Kalaallit

Nunaanni najugaqavissunit ingerlanneqassaaq, tak. Aalisarneq pillugu Inatsisartut inatsisaanni § 8, imm. 1. Nunani allani innuttaassuseqartut Danmarkimeersuunngitsut Kalaallit Nunaanni najugaqavissut aammalu ukiuni marlunni ataannartumik najugaqareersut danskit naalagaaffianni innuttaassuseqartunut

naligitinneqassapput.

Imm. 2. Inuussutissarsiummut atatinngu kapisilinnik aalisarneq piffissap Naalakkersuisunit aalajangersarneqartup iluinnaani pisassiisarani inuussutissarsiutigalugu aalisarneq pisinnaavoq.

Imm. 3. Inuussutissarsiummut atatinngu kapisilinniarnermi qarsorsat qissattaatillu atornissaat inerteqqutaanngillat kiisalu qassutit (ataatsit) 2000-inik nigartallit, taakkua tasillugit nigartaat minnerpaamik 140 mm-iusut.

Imm. 4. Qassutit nigartaat uuttorneqassapput aalisarnermik nakkutilliisut uuttuutaata $\frac{1}{2}$ kiilumik oqimaalutserlugu nigartamut ikkunneratigut nakkartinneqatigullu. Qimiaa puttalatitsisoq atuarlugu nigartat 20-t qimiaanut ungaseqatigiit uuttorneqassapput. Nigartat tamarmik imm. 1-imi piumasaqaat eqqortissavaat.

Imm. 5. Qassutit kapisilinniutit atorneqartut tamarmik piginnittup aqqanik imaluunniit taassuma angallataata aqqanik nalunaaqutsersugaassapput. Nalunaaqutsiinnermi atorneqartoq imermi allannguajaatsuussaaq.

Imm. 6. Silap pissusaata taamaattoqartissinnaappagu qassutit kapisilinniutit akuttunngitsumik akulikitsumillu qassusiartigineqartassapput, pisat uumanissaminnut periarfissaat ajornerulertussaajunnaarlugit.

Inuussutissarsiummut atatinngu kapisilinnik aalisarnermit pisanik nalunaaruteqartarneq

§ 11. Inuussutissarsiummut atatinngu kapisilinnik aalisarnermi kapisillit pisinneqartut tamarmik KANUAANA-mut nalunaarutigineqassapput.

Imm. 2. Pisanik nalunaaruteqarneq nalunaarummut ilanngussaq 2 atorlugu, oqarasuaat imaluunniit e-mail atorlugit nalunaaruteqarnikkut pisassaaq. Nalunaarutit kingusinnerpaamik ullup pisaqarfiup aqaguani KANUAANA-mut, Postboks 501, 3900 Nuuk, Telefax 34 63 60 atorlugu imaluunniit e-mail gflk@nanoq.gl atorlugu nassinneqassapput.

Akiliilluni kapisilinnik aalisarneq

§ 12. Takornariat taamaallaat kapisilinnik aalisarsinnaapput akiliilluni aallaaniarneq aalisarnerlu pillugit Namminersorlutik Oqartussat nalunaarutaat naapertorlugu.

Imm. 2. Taamaallaat akiliilluni kapisilinniartoqarsinnaavoq piffissap Naalakkersuisunit aalajangersarneqartup iluinnaani pisassiisarani inuussutissarsiutigalugu aalisarneq pisinnaavoq.

Imm. 3. Akiliilluni kapisilinnik aalisarnermi taamaallaat qarsorsap qissattaatillu atornissaat akuerisaavoq.

Imm. 4. Imm. 1 naapertorlugu kapisillit pisinneqartut Kalaallit Nunaanni Kalaallit Nunaataluunniit avataani pisiarineqaratillu tuniniarneqassanngillat.

Nakkutilliineq

§ 13. Angallatit, nalunaarummi matumani pineqartut KANUAANA, Sakkutuut imarsiortut (GLK), piniarnermik aalisarnermillu nakkutilliisut kiisalu politiit suleqatigissavaat suliffeqarfiit taakkua suliassaminnik isumaginninneranni, tak. aalisarneq pillugu Inatsisartut inatsisaanni §§ 26-31.

Imm. 2. Angallatit qulakkiissavaat KANUAANA-p, GLK-p aammalu politiit sulisuisa kiisalu piniarnermik aalisarnermillu nakkutilliisut ajornaquteqanngitsumik ikillutik angallammik nakkutilliinissaat.

Pineqaatissiissutit

§ 14. § 2, imm. 1-imik, oqaaseqatigiit aappaat, § 3, imm. 1-imik, § 4, imm. 1-imik aamma 3-mik, § 5, imm. 1 nr. 2-mik, § 6, imm. 3, 4 aamma 5-imik, § 7 imm. 3-mik, § 8 imm. 2-mik, § 9, § 10, § 11, aamma § 12-mik unioqqutitsineq akiliisitaanermik aamma pisanik arsaarinninnermik kinguneqarsinnaapput. §§ 4, 10 aammalu 12-imik unioqqutitsineq taamatuttaaq piniutitik atorineqartunik arsaarinninnermik kinguneqarsinnaavoq.

Atortuulerfia

§ 15. Nalunaarut ulloq 1. august 2012 atortuulerpoq. Tamatuma peqatigisaanik kapisilinniarneq pillugu Namminersorlulik Oqartussat nalunaarutaat nr. 21, 10. august 2002-imeersoq atorunnaarpoq.

Namminersorlulik Oqartussat, ulloq 1. august 2012.

Ane Hansen

/

Jens K. Lyberth

Ilanngussaq

Namminersorlulik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlulik Oqartussat inatsisinut toqqorsiviat
Naalakkersuisut